

Nunatsinni avatangiisinut aningaasaateqarfimmik pilersitsinissaq sulissutigeqqullugu kiisalu Inatsisartut aningaasanut inatsisaanni konto 24.11.23-mi naatsorsuutit, nukissiornermi ikummatissanut avatangiisit pillugit akitsuutikkut isertitat avatangiisinut aningaasaateqarfimmut atugassanngorlugit immikkoortinneqartaler-nissaat sulissutigeqqullugu Naalakkersuisut peqquneqarnissaannik Inatsisartut aalajangiiffigissaattut siunnersuut.

(Siumumi Inatsisartunut ilaasortat Kim Kielsen aamma Malik Berthelsen)

Akissuteqaat

(Nunamut Namminermet, Pinngortitamut Avatangiisinullu Naalakkersuisoq)

Siullermeerneqarnera

Siumut sinnerlugu Inatsisartunut ilaasortat Kim Kielsen aamma Malik Berthelsen, siunnersuuteqarput avatangiisinut aningaasaateqarfimmik pilersitsinissaq pillugu, siunnersuutigineqarlunilu taanna nukissiornermi atorneqartumit ikummatissamut akitsuutit aqqutigalugit aningaasalersorneqassasoq.

Akitsuusiinermi siunertarineqartarput isertitaqarnissaq, taassuma peqatigisaanik pissutsinik iluarsiiisuteqarneq imaluunniit killiliiniarneq.

Avatangiisinut akitsuutit akileraarutit akitsuutillu allat assigalugit nalilersorneqartartussaapput agguaaassisarnermi naalakkersuinikkut ingerlatsinermi sunniutit, inuiaqatigiinni aningaasartuutit aningaasalersorneqarnissaanut periarfissat, takulertoruminassuseqarnerat, inuussutissarsiutit suliffissaqartitsinermullu sunniutit kiisalu allaffissornikkut aqutsinermi aningaasartuutit ilaatillugit nalilersuisarnerni tunngaviit nalinginnaasut atorlugit.

Naalakkersuisut isumaqarput siunertanut aalajangersimasunut atugassanik akileraarusersuinerit aamma akitsuusersuinerit kingunerissagaa naalakkersuinermik suliaqartut pisariaqartumik pingaarnersiulluni tulleriiaarinerup periarfissaarutsitaanerat, aamma avatangiisinut pitsanngorsaaniissamik iliuusissap aallartitassap annertussusissaa aalajangerneqassaaq isertat qanoq annertutiginerat aallaavigalugu, akerlianik iliuusissap kissaatigineqartup annertussusissaa naalakkersuinikkut, avatangiisit pillugit imaluunniit ajunginnerpaanersoq nalilersorneqarani.

Aningaasat avatangiisit pitsanngorsarneqarnerinut suliniutinut atugassat aningaasanut inatsimmi avatangiisinut tunngasunut aningaasaliissutit aqqutigalugit qulakkeerneqartassapput. Tamanna ima paasineqassanngilaq avatangiisinut akitsuutinik nutaanik atortuulersitsisinnaaneq isumaliutigineqassanngitsoq, kisiannili akitsuutinik taamatut ittunik atortussanngortitsisoqassagaluarpat akitsuutinit taakkunannga isertitat Nunatta karsianut ikineqassapput akileraarutinit akitsuutinillu allanit isertinneqartartut assigalugit.

Tassunga atatillugu Naalakkersuisut ilisimatitsissutigissavaat kommunit suleqatigalugit aamma aningaasalersueqatigalugit eqqannut tunngasunik misileraanerit kiisalu igitassanik tigooraaveqarfinnik eqqakkallu pilerfii aallaavigalugit immikkoortiterisarfinnik pilersitsiortuinerit ingerlalluarmata, eqqakkat pillugit iliuusissatut pilersaarummi anguniakkat naapertorlugit.

Naalakkersuisut malugeqquvaat ullumikkut Nunatsinni avatangiisinut aningaasaateqarfimmik peqareemat, taanna 1989-imi pilersinneqarpoq, avatangiisinullu aningaasaateqarfik ukiumut 30.000-80.000 kr.-inik suliniutinut tapersersuilluni aningaasaliissuteqartarpoq.

Qulaani taaneqartut tunngavigalugit, Naalakkersuisut inassutiginegaat aalajangiiffigisassatut siunnersuut itigartinneqassasoq.